



**basic education**

Department:  
Basic Education  
REPUBLIC OF SOUTH AFRICA

## **NATIONAL ASSESSMENT GENERAL EDUCATION CERTIFICATE (GEC)**

### **2023 GRADE 9 PILOT STUDY**

Sifundvo: Siswati Lulwimi Lwekucala Lwekwengeta

Emamaki: 70

Sikhatsi: 150 Emaminitsi

**ngaphandle** kwemaminitsi ekufundza la-15

Lesivivinyo sinemakhasi la-**26** ngaphandle kwelikhasi leliyikhava.



### **Ticondziso kumfundzi**

1. Utawunikwa emaminitsi ekufundza la-15 ngembi kwekucala uphendvule lesivivinyo.
2. Fundzisa kahle tonkhe ticondziso kanye nemibuto.
3. Phendvula yonkhe imibuto.
4. Sebentisa incwadzi yekuphendvulela lonikwe yona kubhala tonkhe timphendvulo takho.

**Sivivinyo sicala ekhasini lelilandzelako.**



**Ungaphenyi likhasi ngembi kwekutsi utjelwe kutsi wente njalo.**

## Umbuto 1: Sivisiso

Fundza lethekelele bese uphendvula imibuto lelandzelako.

### ***“Sibambisene sonkhe singalwa ne-COVID-19”***

Umhlaba usebuhlungwini lobukhulu kabi ngesimo setemphilo yesive lesiphutfuma ngendlela lengakate seyibonwe phambilini eminyakeni lelikhulu. Kubhebhetheseka kweligciwane le-Corona, lokubanga sifo lekutsiwa yi-COVID-19, siphutfume ngesivini lesimangalisako futsi safinyelela yonkhe indzawo. Manje sesibitwa ngekutsi lubhubhane lwemhlaba. Ayivinjwa kuma kwenzawo noma imincele. Ibambe bantfu labancane nalabadzala, futsi imandla emaveni lasatfutukile nakulawo lasatfutuka. Lapho kukhushulwa lizinga lekucilongwa nekuhlolwa, linani lalabangenwe ngulesifo eNingizimu Afrika lilindzeleke kutsi likhuphuke. Ngisandza kumemetela simo senhlekelele, lekusinyatselo lesilingana nekuba kubi kwaso ebantfwini bakitsi, emmangweni wakitsi nasemnotfweni wetfu. Loku kutawusenta kutsi sibe nendlela lelanganisile nalechumene yekulawula lenhlekelele kanye nekusungula tinchubo letiphutfumako tekubukana naso, letisheshisa kakhulu futsi letisebenta ngemphumelelo.

Leligciwane liyaphatamisa kakhulu futsi lesikubeka embili kuphephisa temphilo nenhlalakahle yabo bonkhe bantfu baseNingizimu Afrika. Sifanele kutsi sibukane nesimo semnotfo lesibi lesingekile sigwemeke. Sifanele kutsi silindzele kwehla kwelizinga lemphahla letsengiselwa lamanye emave, kwehla kwelinani letivakashi letingenako, nemtselela lomubi kabi kutekukhucita, kusebenta kwemabhizinisi nekwakheka kwematfuba emisebenti nekugcina tisebenti emsebentini. Ikhabinethi isenchubeni yekupheta iphakheji lenkhulu yetingenelele tekunciphisa lomtselela we-COVID-19 lolindzelekile emnotfweni wetfu. Loku kwentiwa ngekubonisana nemabhizinisi, tisebenti kanye naletinye tikhungo letifanele. Ngu-Louis Pasteur lowatsi sigwaca lesihle ngulesishoshako. INingizimu Afrika ime ngemumo, futsi beyiloku injalo sikhatsi lesidze. Kusukela ngesikhatsi kubikwa kubhedvuka kwalesifo kwekucala savele saphakamela etulu semisa ngemumo tindlela tekucilonga nekulawula lesifo.

Kubukana kwetfu kwavelonkhe nalesifo kuchutjwa Likomiti leTindvuna (i-IMC) leliholwa kahle kakhulu yiNdvuna yeTemphilo Dkt. Zweli Mkhize, lobuye futsi abe

ngusihlalo walo.

Indlela le-MIC nemacembu lasekelako labukene naso lesimo lesiphutfumako. Ibe sibonelo yabuye futsi yacinisekisa ikakhulukati ekusiteni kucedza kuphaphuleka nekwetfuka kwesive. Ngitawube ngingusihlalo weMkhandlu waVelonkhe weKukhipha Sicondziso sekuchumanisa tonkhe tinhlangothi tekuphendvula kwetfu kwavelonkhe.

INiningizimu Afrika inelirekhodi lelatiwako lekulawula timo letiphutfumako tetemphilo yesive. Sinelwati, tintfo netindlela tekusebenta kanye nemakhono. Bososayensi nebetekubhedvuka kwelubhubhane basezingeni letemhlaba.

Simise ngemumo luhlaka lwetinyatselo letiphutfumako, futsi sitawenta kutsi kube nemali yekufezekiswa kwato. Letinyatselo tifaka ekhatsi; kuvalwa kwetivakashi letibuya emaveni lasengotini lenkhulu, kuhlolwa lokuphococelekile, kutihlunga kulabanye noma kuvalelwa kwebantfu baseNingizimu Afrika lababuya kulawo mave bodwana; nekucinisa kugadza, kucilongwa nekuhlolwa eminceleni yekungena kuleli laseNingizimu Afrika. Kutihlunga kulabanye kwetehlalo kubaluleke kakhulu uma ngabe sifanele kutsi silawule kubhebhethseka kwale-COVID-19. Imibutsano yebantfu labangetulu kwalaba-100 ayikavumeleki futsi nekugujwa kwemikhosi yemalanga avelonkhe kumisiwe. Kuvakashela kuto tonkhe tikhungo tekucondziswa kwesimilo (emajele) kumisiwe ntsi! kute kube ngemalanga la-30. Luhambo lwetikhulu tahulumende lolungakabaluleki lwekuya kulamanye emave kwalelwe ngekwemtsetfo futsi-ke neluhambo lwangekhatsi kuleli lakitsi alukhutsatwa.

Kutawuvalwa imincele yekuhamba phansi le-35 kanye namibili yaselwandle. Kanjalo netikolwa nato titawuvalwa kusukela mhla ti-18 Indlovulenkulu kute kwedlule imphelelantfo yeLiphasika. Masinyane nje sitawumemetela tinyatselo letitawutsatfwa mayelana nemanyuvesi nemakolishi. Liphasika likulenyanga letako. Sikhatsi lesingcwele kutenkholo letinyenti nesikhatsi lapho kuba khona tinkonzo letinkulu nemibutsano. Imimango yetenkholo ifanele kutsi itsatse tincumo mayelana naloko lokuvuna kahle kakhulu temphilo yemakholwa kanye nalelive lonkhe.

[Vuk'uzenzele letivela e-Union Buildings Mabasa 2020 Lushicilelo 1]

1.1 Ngekusho kwaletheksthi, sifo sini lesibhebhetseke ngekuphutfuma eNingizimu Afrika?

A Yi-TB

B Yi-COVID-19

C Yi-COLVID-19

D Umdlavuza

(1)

1.2 Ukhatsateke ngani umhlaba? Khetsa **lokungesilo** liciniso kuloku lokulandzelako.

A Ngetebugebengu eveni.

B Ngetenhlalakahle tesive.

C Ngetemnotfo wesive.

D Ngetemphilo tesive.

(1)

1.3 Lubhubhane lwemhlaba: basho kutsi ....

A kuyabhukushwa etifeni.

B kufa labakhulile bonkhe.

C kufa kwetilwane.

D kubulala wonkhe wonkhe.

(1)

1.4 Ngekusho kwaletheksthi, ngubani Ndvunankhulu lobekamele Litiko Letemphilo kuleli?

A Dkt. Zweli Mkhali

B Dkt. Zwelakhe Mkhize

C Dkt. Zweli Mkhize

D Dkt. Zwelihle Mkhiva

(1)

1.5 Khetsa umusho **longahambisani** nekuhamba kwalesifo kunayi lonikwe yona.

- A Ibhebhethseka mhlaba wonkhe.
- B Ibamba bonkhe bantfu netilwane.
- C Ayivinjwa kuma kwenzawo noma iminyele.
- D Isemaveni latfutukile nalaphuyile mhlaba wonkhe. (1)

1.6 Sifanele kutsi sibukane nesimo semnotfo lesibi lesingeke sigwemeke.

Lomusho longenhla uchaza kutsi live libukene ....

- A nekutsintseka kwetenhlahakahle nematfuba emisebenti.
- B nekugula lokungalawuleki kubantfu labadzala.
- C nekuhlukunyetwa kwebantfu eveni.
- D nekweswela temphilo letisezingeni. (1)

1.7 Leligciwane liyaphatamisa kakhulu futsi lesikubeka embili kuphephisa temphilo nenhlalakahle yabo bonkhe bantfu baseNingizimu Afrika.

Lomusho longenhla usitjela kutsini ngebaphatsi belive laseNingizimu Afrika?

- A Banemusa kubasebenti.
- B Banakekela inhlalakahle yabo bonkhe.
- C Batiphatsa kahle tigulane.
- D Bayasita etibhedlela. (1)

1.8 Ngekuya kwaletheksthi, yini **lengakatsikameteki** ngenca ye-COVID-19?

- A Ngumhlaba wonkhe.
- B Lumphakelo lwemanti nagesi.
- C Temphilo, tenhlalakahle netemnotfo.
- D Temincele yemave onkhe. (1)

1.9 Sifanele kutsi 'sibukane' nesimo semnotfo lesibi lesingeke sigwemeke.

Leligama lelikubokhulunyiwe kulomusho longenhla lisitjela kutsini mayelana nebaphatsi belive ngalesimo lesikhona?

- A Kumele basinake nje kuphela.
- B Kumele basiyekele njengobe sinje.
- C Kumele bente taba tekumelana naso.
- D Kumele bacele lamanye emave abukane naso. (1)

1.10 Ibe sibonelo yabuye futsi yacinisekisa, ikakhulukati ekusiteni icedza 'kuphaphuleka' kwesive.

Ngukuphi **lokungahambisani** nemcondvo losebaleni walenkhumulo lekubokhulunyiwe kulomusho longenhla?

- A Kucedza luvalo.
- B Kucedza kwesaba.
- C Kuncoba kwetfuka.
- D Kucedza kweyisa. (1)

1.11 Sifanele kutsi silindzele kwehla kwelizinga lemphahla letsengiselwa lamanye emave.

Usitjelani lomusho longenhla ngelive laseNingizimu Afrika?

- A Kutawuba nenhlupheko eNingizimu Afrika.
- B Kutawehla inhlupheko eNingizimu Afrika.
- C Kutawuphela kucindzetelwa eNingizimu Afrika.
- D Kutawehla umkhicito lowentiwa eNingizimu Afrika. (1)



1.12 'Ayivinjwa kuma kwenzawo noma imincele, ibamba bantfu bonkhe, futsi imandla emaveni lasatfufukile nakulawo lasatfufuka'.

Lenzinyana lecashuniwe lengenhla isinika liphi liciniso nge-COVID-19? Isinika liciniso lelitsi, i-COVID-19 ibamba:

- A labagulako nalabadzala kuphela.
- B labakhubatekile kuphela.
- C labancane nalabadzala.
- D bogogo nabomkhulu kuphela. (1)

1.13 Ngukuphi lesikutfole kuletheksthi ngalesifo ngekubhebhetheseka kwaso?

- A Asinalo lubandlululo.
- B Siyabandlulula
- C Sifuna labakhetsekile.
- D Sitselelana kulabo labatanako kuphela. (1)

1.14 Ngu-Louis Pasteur lowatsi 'sigwaca lesihle ngulesishoshako'.

Iluhlobo luni lenkhulumo lekubokhulunyiwe kulomusho longenhla?

- A Sisho
- B Saga
- C Nguletsatsa luhlangotsi
- D Ngulehhungako (1)

1.15 Manje sesibitwa ngekutsi 'lubhubhane' lwemhlaba.

Leligama lelikubokhulunyiwe kulomusho longenhla lichaza kutsini?

- A Sibulala ngalokulingene.
- B Sibulala ngekushesha nangebunyenti.
- C Siyefusa kakhulu.
- D Selapheka ngekushesha. (1)

1.16 Ngusiphi sizatfu lesenta kutsi kuvalwe live lonkhe nakuvela lesifo?

- A Kute ligciwane liphele.
- B Kute bantfu baphile.
- C Kute sifo sedlule ngekushesha.
- D kute bantfu bangatselelani ngalesifo. (1)

1.17 Kuletheksthi libito 'Ningizimu' licala ngafeleba noma lisemkhatsini wemusho. Kungani?

- A Libitomfakela
- B Libitongco
- C Libitomvama
- D Libitombici (1)

1.18 Umshwana 'kutihlunga kulabanye' usho kutsini?

- A Kutikhetsa kulabanye.
- B Kutibeka embili.
- C Kutihlanganisa nalabanye.
- D Kutifihla kulabanye. (1)

1.19 Nasifundza lethekesthi sitfola kutsi mengameli naketfula lenkhulumo abephatseke njani?

- A Abejabulile
- B Abekhatsatekile
- C Abekhululekile
- D Abetfokomele

(1)

1.20 Lethekesthi lengenhla icondziswe kutiphi tetsamelilwati?

- A Kubantfu bebane-COVID-19.
- B Kutivakashi nakubantfu basemaphandleni.
- C Emiphakatsini yaseNingizimu Afrika.
- D Labasemitfolamphilo.

(1)

1.21 'Kuvalelwa kwebantfu lababuya kulamanye emave bodwana ngembi kwekutsi bahlangane nebaseNingizimu Afrika'

Lenkhulumo lengenhla isitjelani ngekucikelelwa kwetekuphepha eveni?

- A Ngeke basavakashelwa noma bavakashe.
- B Kwesaba tihlobo letibuya kulamanye emave.
- C Kuphela kwemisebenti kulabaseminceleni.
- D Kwesabela kutselelana ngalesifo.

(1)

1.22 Ngumuphi umlayeto lowedluliswa ngumphatsi welive ngekwetfula lenkhulumo?

- A Kucaphelisa nekudvudvuta live ngesimo.
- B Kwecwayisa live ngebantfu bangaphandle.
- C Kubonelela basebenti betemphilo.
- D Kwecwayisa bafundzi bemaphephandzaba.

(1)

1.23 Ngutiphi tinkhomba **letingahambelani** nekugwema kubhebhethseka kwe-COVID-19 lokushiwo kuletheksthi?

- A Kuvalwa kwelive lonkhe nekuhlala etindlini.
- B Imibutsano yebantfu labangetulu kwalaba-100 ayikavumeleki.
- C Kuvakashelwa kwabomakhelwane akuvumeleki.
- D Kubanjwa kwemicimbi nemibutsano. (1)

1.24 'Liphasika likulenyanga letako, sikhatsi lesingcwele kutenkholo letinyenti, nesikhatsi lapho kuba khona tinkonzo letinkhulu nemibutsano. Imimango yetenkholo ifanele kutsi itsatse tincumo mayelana naloko lokuvuna kahle kakhulu temphilo yemakholwa kanye nalelive lonkhe'.

Lenzima lengenhla isitjela kutsini ngeLiphasika?

- A Liphasika lingachubeka njengasemihleni.
- B Bantfu batalibambela emakhaya.
- C Emabandla awakavunyelwa kuhlangu.
- D Emabandla kumele atsatse tincumo kucala ngalo. (1)

1.25 Kukunika siphi sifundvo kwetfulelwa kwesive ngesimo setemphilo?

- A Kutsi sive sati kabanti ngetemphilo telive.
- B Kutsi sive sikhutsalele kusebenta.
- C Kutsi sive sichumane nalamanye emave.
- D Kutsi sive sitihloniphe. (1)

**[25]**

Umbuto 2: Ematheksthi latibonwa

## 2.1 Sikhangisi

Fundza lephosta bese uphendvula imibuto lelandzelako.

**MAMATSEKA NGAJAMU!**

**Imphilo lendze!**

- Jamu lowentiwe ngetitselo letisandza kuvunwa:
  - ✓ Ema-apula.
  - ✓ Emagilebisi.
  - ✓ Emastilobheli.
  - ✓ Emapentjisi.
  - ✓ Emawolintji.
- Lokunika takhamtimba
- Lokunika ingcondvo lehlahlambile!

**Kute lokwengca jamu!?**

*[Isuselwe ephaphabhukwini i-Drum lamhla ti- 24 Mabasa 2013]*

2.1.1 Lesikhangisi lesingenhla sikhangisani? Khetsa kunye lokuchaza kancono ngaso kulokulandzelako:

- A Jamu lohlekisanako.
- B Bafundzi labadla jamu.
- C Jamu lomnandzi lowakha umtimba nalokunika imphilo.
- D Kubaluleka kwajamu.

(1)

2.1.2 Ngabe lesikhangisi sicondziswe kutiphi tetsamelilwati?

- A Sicondziswe ebantfwini labasha labafundza sikolo.
- B Sicondziswe ebantfwini labafuna kuhlala bajabulile.
- C Sicondziswe ebantfwini labatsandza sinkhwa lesimhlophe.
- D Sicondziswe ebantfwini bemantfombatane.

(1)

2.1.3 'Lokunika ingcondvo lehlahlambile'.

Ichazani lenkhulumo lengenhla?

- A Lojamu ukwenta ucabange kancane.
- B Lojamu ukwenta ucabange ngekushesha.
- C Lojamu wenta ingcondvo ihlanye.
- D Lojamu wenta ingcondvo ihlangahlangane.

(1)

2.1.4 Ngukuphi lokuvela kulesikhangisi lokufakazela kutsi sikhuluma ngekuphila saka kwentimba?

- A Mamatseka ngajamu.
- B Kute lokwengca jamu.
- C Lokunika takhamtimba.
- D Lokunika ingcondvo lehlahlambile.

(1)

2.1.5 Ngekwati kwakho ngabe kudla kakhulu jamu ngaso sonkhe sikhatsi kuhle yini?

- A Kuhle ngobe kungenta umtimba wakheke kakhulu.
- B Kubi ngobe kutawube kuhlaphata imali yekutsenga jamu njalo.
- C Kuhle ngobe vele jamu umnandzi.
- D Kubi ngobe kudla tintfo letinashukela ngalokwengcile kuyingoti.

(1)

**[5]**

## 2.2 Ikhathuni

Fundza lekhathuni bese uphendvula imibuto lelandzelako.



2.2.1 Hlobo luni lwemdlalo lokukhulunywa ngawo kulekhathuni eFremini 1? (1)

2.2.2 Nguluphi lusito lwalomdlalo ngekusho kwalabantfu labakhulumako? (1)

2.2.3 Bhala letinye tihlobo temidlalo **LETIMBILI** lotatiko letingasetjentiswa esikhundleni salona lokukhulunywa ngawo kulekhathuni. (2)

2.2.4 Efremini 3 ngumuphi emkhatsini kwaTumi naZodwa lomsebentela kahle lomdlalo? Sekela. (2)

2.2.5 'Ngiyehla kancane kancane ngifuna 'kukhipha lunyawo' (eFremini 3)

Lenkhulumo lekubokhulunyiwe kulomusho longenhla ichaza kutsini? (2)

2.2.6 Ngabe kuhle nobe kubi yini loku lakukhulumako lesimbona efremini 4?

Sekela. (2)

**[10]**



### Umbuto 3: Sifinyeto

Fundza lesiceshana bese uyasifinyeta **mayelana netizatfu tekubhebhetsaka ngemandla kweligciwane le-COVID-19** ngekulandzela leticondziso letilandzelako.

1. Nika luhlu lwemaphuzu **LASIKHOMBISA** ngemisho legcwele.
2. Bhala tinombolo temisho yakho kusuka ku-1 kuya ku-7.
3. Gcamisa liphuzu **LINYE** kuphela kumusho ngamunye.
4. Sebentisa emagama akho ngalokuphelele.
5. Sifinyeto sakho asibe nebudze lobungemagama la-50-60.
6. Khombisa linani lemagama lowasebentisile kubakaki ekugcineni kwesifinyeto.
7. Akukadzingeki kutsi ubhale sihloko sesifinyeto sakho.

#### **Tizatfu Tekubhebhetsaka Ngemandla Kwe-Covid-19**

Kunetizatfu letinyenti talokukhuphuka ngemandla kwemanani lamasha ekwesuleleka, kodwa manje timbangela letinkhulu seticala kucaca. Imibutsano, ikakhulu yetenhlalo nemadzili/imicimbi, ngito timbangela letinkhulu tekubhebhetselisa leligciwane. Kuleminyenti yalemibutsano akukhweshelwana. Tindzawo lekubanjelwa kuto tiba siminyeminye kantsi futsi atingenisi tibuye tikhipe kahle umoya. Sibulalamagciwane sekugeza tandla asihlali sikhona futsi bantfu abatifaki tifonyo tabo. Bantfu labanyenti banatsa tjwala kulemicimbi 'lebomabhebhetsekisa labakhulu', lokubangela kutsi bantfu bangabe basakunaka kakhulu kugcina imigomo yekutivikela kanye nekuvikela kungenwa nguleligciwane.

Umkhosi wekugubha kuphotfula matikuletjeni losandza kubanjwa eBallito usikhumbuto lesibuhlungu kabi sekutsi imibutsano lemikhulu ingaba yingoti kangakanani. Siyati bantfu labasha baseGauteng labacishe babe yi-1000 labebahambe lomcimbi bahlolwe batfolakala banalo leligciwane leCorona. Lesingakwati kutsi bangaki labanye bantfu labesulelwe ngulabantfu labasha. Kutsiwa kungaba yimindeni lengefika e-300 lekungenteka kutsi yesulelekile. Liciniso lelibuhlungu ngalolubhubhane kutsi imicimbi, emakhonsathi kanye nemadzili lekufanele kutsi ngabe yimigubho yenjabulo nekutijabulisa kukhombisa kuba ngumtfombo wekwesuleleka kanye nekugula, futsi kungaholela ngisho

nasekufeni.

Lokunye lokubangela lokukhuphuka kwemanani ekwesuleleka kukhula kwelizinga lekuhamba kwebantfu. Bantfu labanyenti abatigcini tinyatselo tekuvikela kwesuleleka ngesikhatsi bahamba emadolobheni kanye nasemaphandleni, nasemkhatsini wetindzawo letehlukene. Sifanele kutsi sicaphele ngalesikhatsi sihamba kakhulu, nematfuba ekubhebhethseka kwalesifo nawo aba manyenti. Loku kusho kugcoka sifonyo uma ugibele sigitjelwa semmango nekwenta siciniseko sekutsi emafasitelo aso avuliwe ngaso sonkhe sikhatsi. Kuphindze futsi kusho kutsi unciphise linani lebantfu locitsa sikhatsi unabo uma ngabe uhamba uvakashela umndeni nebangani kuletinye tincenye talelive. Kuphephile kuhlala nemndeni wakho lodvute nawe kunekutsi ube kumibutsano lemikhulu lengabangela kubhebhethseka kwaleligciwane.

Kulandzela letinyatselo kubaluleke kakhulu ngoba kwesuleleka kuvamise kubangwa bantfu lasebasulelekile kodwa labasengakakhombisi timphawu tekwesuleleka. Kungenteka babe nato kepha babe bangati nekutsi sebanalo leligciwane. Kuba phasi kakhulu kwemanani ekwesuleleka kuletinyanga letimbalwa letedlulile kusente sakhululeka kakhulu sangasagcoki tifonyo tetfu letivala timphumulo nemlomo.

[Vuk'uzenzele letivela e-Union Building Indlovana 2021 Lushicilelo 1]

[10]

#### Umbuto 4: Lulwimi

Fundza lethekesthi bese uphendvula imibuto lelandzelako

### **Impfungushe nesikhukhukati**

Bekubhoke somiso sendlala kulo lonkhe live. Impfungushe bese icedze lishumi lemalanga ingakwati lokuya etfunjini. Beyivuka ekuseni ngembulukusa itfungatse lengahle ikudle eceleni kwato tonkhe tihosha. Bese ihambe libanga lelidze ingati kutsi itawukutfolaphi. Umuti wemphungushe bewuchelelene newaletinye tilwane. Bese iyibulele indlala. Phela timphungushe ngito kuphela tilwane letikwati kuhlala sikhatsi lesidze ngendlala kodwa tingafi. Impfungushe yabona sikhukhukati sitihambela, khashane le, yacondza kuso. Lesikhukhukati besidla ekhatsi etihlahleni letinyenti kakhulu. Beyigwinya ematse ingacedzi, seyibona kutsi lamuhla itawushaya sentfwala. Pho, kunini inganambitsi lutfo! Ngaze ngaphumelela mine msa waMphungushe. Lesa sikhukhukati ngiyawusidla netinsiba taso. Silibuka siyaligcina lalamuhla. Inesibindzi lesimangalisako phela impfungushe

Sikhukhukati lesaboniwa yimphungushe besinonile ngoba besidla endzaweni levundzile. “Ngitawucala ngenhloko, ngidle imilente bese ngigcina ngemtimba”. Kwasho impfungushe. “Sisila ngitawusiphatsela bantfwana ekhaya. Nabo batawushaya lesibovu”. Nase yesutsi impfungushe kuba yindlovu iyositsela ngiyakutjela. Sibonakala sisincane kakhulu sisila salesikhukhukati. Mnumzane Mphungushe wasondzela kancane, kancane esikhukhukatini. Itsite nayisondzela impfungushe, yeva umsindvo lomkhulu wesigubhu lesikhala emtsini sishaywa ngemandla.

*[Iikhasi 56 Umfuso DE Nkosi]*

4.1. Bese iyibulele 'indlala'.

Lelibito lelikubokhulunyiwe kulomusho longenhla liluhlobo luni?

- A Libitomvama
- B Libitosimo
- C Libitongco
- D Libito

(1)

4.2 'Silibuka siyaligcina lalamuhla'.

Lomusho longenhla uluhlobo luni?

- A Ngumusho lombici
- B Ngumusho lophocako
- C Ngumusho losalibito
- D Ngumusho locondzile

(1)

4.3 'Beyigwinya' ematse ingacedzi, seyibona kutsi lamuhla itawushaya sentfwala.

Khetsa mcondvofana walelibito lelikubokhulunyiwe kulawa lonikwe wona.

- A Beyimita
- B Beyidla
- C Beyinambitsa
- D Beyehlisa

(1)

4.4 Bese ihambe libanga 'lelidze' ingati kutsi itawukutfolaphi.

Khetsa mcondvophika walelibito lelikubokhulunyiwe.

A Lelincane

B Lelibanti

C Lelifisha

D Lelidzana

(1)

4.5 Lesikhukhukati besidla ekhatsi 'etihlahleni letinyenti kakhulu'.

Khetsa ligama lelichaza lomshwana lokubokhulunyiwe ngenhla

A Esihlahleni

B Ehlatsini

C Etigodvweni

D Ematakini

(1)

4.6 Bantfwana bemphungushe batawudla besutse ..... unina ubaphatsele sisila sesikhukhukati.

Sebentisa sihlanganisi lesingiso kulomusho longenhla.

A kepha

B kodvwa

C ngoba

D kube

(1)

4.7 Lesa sikhukhukati ngiyawusidla netinsiba 'taso'.

Hlobo luni lwesichasiso leligama lelikubokhulunyiwe?

A Linani

B Sibaluli

C Siphawulo

D Buniyo

(1)

4.8 Beyivuka 'ekuseni' ngembulukusa itfungatse lengahle ikudle.

Hlobo luni lwesandziso leligama lelikubokhulunyiwe kulomusho longenhla?

A Sandziso sesikhatsi

B Sandziso sendzawo

C Sandziso sesimo

D Sibanjalo

(1)

4.9 Sikhukhukati 'sadliwa' bantfwana bemphungushe.

Leligama lelikubokhulunyiwe kulomusho longenhla limumetse yiphi imphambosi yesento?

A Imphambosi yekwentela

B Imphambosi yekwentiwa

C Imphambosi yekwentisa

D Imphambosi yekwenteka

(1)

4.10 'Umuti' wemphungushe bewuchelelene newaletinye tilwane'.

Khetsa inshokutsi yeligama lelikubokhulunyiwe kulomusho longenhla ibe **nguleyehlukile** kunalena lekulomusho longenhla.

- A Lidladla lekuphekela.
- B Sidleko lesihlala tinyoni.
- C Libala lekudlalela.
- D Libala lelimnyama emtimbeni. (1)

4.11 Yakhombisa 'sibindzi' lesimangalisako imphungushe.

Leligama lelikubokhulunyiwe lingaba nayiphi lenye inchazelo leyehlukile kunalena lengenhla naliphinyiswa **ngalokwehlukile**?

- A Kungesabi lutfo.
- B Ngumuntfu longatsandzi kukhuluma.
- C Sitfo semtimba.
- D Ngumuntfu lokhulumela futsi. (1)

4.12 'Mnumzane' Mphungushe wasondzela kancane, kancane kulesikhukhukati.

Khetsa sifinyeto lesingiso saleligama lelikubokhulunyiwe kulomusho longenhla.

- A Mnu.
- B Mno.
- C Mnum.
- D Mnz. (1)

4.13 Ngabe yesutsa yini imphungushe nayicedza kudla lesikhukhukati

Khetsa luphawu lwekubhala lolufanele kufakwa kulomusho longenhla.

A !

B “ ”

C ?

D ;

(1)

4.14 Imphungushe yabona 'sona' sitihambela, khashane le.

Hlobo luni lwesabito leligama lelikubokhulunyiwe kulomusho longenhla?

A Sabito sekukhomba

B Sabito selucobo

C Sabito selinani

D Sabito sebuniyo

(1)

4.15 Sikhukhukati lesaboniwa yimphungushe besinonile ngoba besidla endzaweni levundzile.

Khokha ligama lelipeleke **kabi** kulomusho longenhla.

A Yimphungushe

B Besinonile

C Lesaboniwa

D Levundzile

(1)



4.16 Bese ihambe libanga lelidze ingati kutsi itawukutfolaphi.

Lomusho longenhla umumetse siphil sikhatsi sesento?

- A Sikhatsi sanyalo
- B Sikhatsi lesengcile
- C Sikhatsi leseluliwe
- D Sikhatsi lesitako

(1)

4.17 Khetsa umusho loyinkhulumombiko lebhaleke kahle kulena lelandzelako.

- A “Ngitawucala ngenhloko, ngidle imilente bese ngigcina ngemtimba” Kwasho imphungushe.
- B Ngitawucala ngenhloko, ngidle imilente ngigcine ngemtimba kusho imphungushe.
- C Imphungushe itsite itawucala ngenhloko, idle imilente bese igcina ngemtimba.
- D Imphungushe yatsi itawucala ngenhloko, idle imilente bese igcina ngemtimba.

(1)

4.18 Phela timphungushe ngito kuphela tilwane letikwati kuhlala sikhatsi lesidze ngendlala kodvwa tingafi.

Ichazani lenkhulumo lengenhla?

- A Timphungushe tidla kancane, kancane.
- B Tmphungushe atikutsandzi kudla.
- C Timphungushe tiyakhona kumelana nendlala.
- D Timphungushe titsandza kudla letikufunako.

(1)

4.19 Beyivuka ekuseni ngembulukusa itfungatse lengahle ikudle 'eceleni' kwato tonkhe tihosha.

Hlobo luni lwesitfo senkhulumo leligama lelikubokhulunyiwe?

A Sabito

B Ngundzaweni

C Sichasiso

D Sento

(1)

4.20 Naseyesutsi imphungushe kuba 'yindlovu iyositsela' ngiyakutjela.

Khetsa inkhulumo lesho umcondvo lobhacile waleligama lelikubokhulunyiwe. kulomusho longenhla.

A Imphungushe incipha tibunu.

B Imphungushe ifana nendlovu.

C Imphungushe ilingana nendlovu ngemtimba.

D Imphungushe iba nelulaka lolucakile.

(1)

**[20]**

**Kuphela kweSivivinyo**

